

# BROP GUITS NE PQUIAA

## PEDR

---

**1** Bets, bzian, ¡diuzh to grëse to!

Naa nac Simón Pedr, tib ngundziin win ne pxeel Jesús nonee Xtiidz Ndzon me lo miech. Laa naa rquia guits rii rxel naa lo to, ne nac to zha ne squitaa ndzonse dib zdoo rnalo men roob ne zob gbaa, zigne rnaloque no me.

Xquizh Jesús men ne rsilaa miech, men ne nac Dios ne rliladz ne, sac gon me gocniē to squi rnalo to me niina; sac mesi mine nonguiel gac, min co run me.

<sup>2</sup>Zigse zie dze, goltsoxco lozh gunbey to zha nac Dios, zha nac Jesús men ne rnabey ne, zeēna scaāaa zig zie dze zunlayraa me to, zacniēnraa me to, parne peet zhgab ctsebde to. <sup>3</sup>Sac zeēne gunbey to zha nacraa me, con grētaa poder ne rap me, zneedz me guielbiini lo to parne tibaque gban to zigne racladz me, tibaque gleynie to me. ¡Gotsaa gwi ne ganle zha nactaa ncuāane ro, ncuāane gzee zdoo ne been me parne gbig ne lo me! <sup>4</sup>Ni psan me diidz pe nac grē ncuāane ndzon ne gneedz me lo ne. Psan me diidz, ib laa me cuee ne lo grētaa guielyozh ne rac lo guidzliu rii, parne gac ne tib miech mbe zigne nac me.

<sup>5-7</sup>Nli laa to rnalole Dios, per parne ygaa to min co, none tsoxco to:

zaacse golban,

goltsoxco guien to zha nac Dios,

golseed gnabey to xcuerp to,

guieete to,

tibaque goltsoxco golgun mine racladz Dios,

ine niowse golbannie grē zha ne nacgrē to, golsac zho zig tib menlidz to;

golleynie samiech to.

<sup>8</sup>Nana, telne tsoxco to znu gban to, dzigosi mazdraa tsoguiē to mine racladz Dios, dzigosi zlu run to mine rnabey Jesús men ndzon ne rnabey ne, led loxaque runbeydse to me. <sup>9</sup>Sac zha ne tsoxcoda, rrieēquia rchool lo zho ga, rrieēquia rowle guic zho ga, sac gon rsoladzd zho zha nactaa lo grē dol ne blee Dios zho.

<sup>10</sup>Bets, bzian, golguien sca, niina ne laa Dios bzooblle to, laa me bredzle to ngab to lo me, goltsoxco sca golban, parne guiabde to lo dol stib. <sup>11</sup>Niicle

par gdzingaa to zaatne rnabey Jesús, men ne psilaa ne lo dol, men ne rnabey ne, tsod pe yca lo to, ine nzhial nëz zaatne ted to gdziñ to ga.

<sup>12</sup>Nli nanle to grë mine rne naa nu, nli dziitsle zo to lo Xtiidz Dios, per ib none guncsoladz naa tow. <sup>13-14</sup>Laa Jesús men ndzon ne rnabey ne, blule lo naa zhile gdziñ dze ne laa naa gbi lo guidzliu rii, gane niina laga bii mban naa rgobey naa ible nonguiela znu cso naa diidz lo to; <sup>15</sup>zeena niicle wbile naa lo guidzliuw, tibaque csoladz tow.

### Gonpaa Pedr Jesús

<sup>16</sup>Grëse mine bnee no lo to zeene pseed no to zha nactaa poder ne rap Jesús, ni zha guiaad me stib, guiabde to togo bod guicse no biaba. Led scada gon, tel naa grop lo naa gon naa xquielndzon me <sup>17-18</sup>guic gui ne scataa pxobnen Dios ne men non, men ro nac me. Binpaa naa zëeb tsi Dios gbaa hor co, në me: “Lëë Xpëed naa i gon, rleyne naa me, nziuu me lo naa.”

<sup>19</sup>Ga nagon rlu ne diidzli nac grë mine bzeet grë zha ne biadteed Xtiidz Dios lo miech padzeela; gacxe waa, zig nac to ible nonguiel guien to zha naca. Masaque lëew quiaziiini lo to niina, zig rziini tib biini guieel, haxta riini liu zeene laa Mel Ngol rlan; ni lëë Mel Ngol co nac Jesús. <sup>20</sup>Per scagaa, racladz naa gacnan to ganle, grielod ne lega tel zha guiaabtaa guic miech, guiab zho sca nac mine bzeet zha ne biadteed Xtiidz Dios, <sup>21</sup>sac gon tel zha co, bneed zho ncuaañe biaabtaa guic zho; sinque laa zho bnee mine bnabey Dios psiaab Espiritu Sant guic zho.

### Zha ne rquidie

(Judas 4-13)

**2** Grë zha ne biadteed Xtiidz Dios padzeela, mine bnabey me zho min co bnee zho; per brieequiaque zha ne pquidie rëb zho Dios pxeel zho, ni nlida. Ni scaquegaa niina, grë zha ne rseed to, zrieequia zha ne yquidie lad co. Dzega dzega csilo zho glu zho grë zhiwseed yozh zho, ib gunbeydraa zho men ndzon ne rnabey ne, men ne psilaa zho lo xtol zho; per nand zho zha nactaa guielnë dox ne yгаа zho, tibaque zeene guien zho laa zho nole lo caxtigw co.

<sup>2</sup>Ndal miech ne grieequia tsienal grë ncuaañ yozh ne gun zho, niapse por zha laa grëraa miech csilo gneenë Xtiidz Dios. <sup>3</sup>Zha yozha, laa zho tsienal loxaque dien zha gunlo zho dimi, zguib zho yquidie zho to gdeed to dimi lo zho.

Per ib tedsod zguizh zho min co, sac bzeetle Dios ganle zha nactaa lo guielnë dox ne yгаа zho; <sup>4</sup>sac Diossi gon, mine run grë zha ntseeb, csand mew scase. Golgan ganle, niicxe grë anjl ne sca been falt lo me, gondzed me zho, bleegazh me zho gbaa, bnabey me bioogyu zho tib lo ncowdoo, ga nioogyu zho nieeda gal dze ne laa me gunquizh zho mine been zho.

<sup>5</sup>Padzeela zeene wban Noé, grë miech ntseeb ne bnëd nion xtiidz me niicle ne bneepaa Noé lo zho, scaque gondzed me zho, psiaab me tib guie dox bnitlo zho grëse zho; loxaque Noé ni zgadz menlidz Noé psilaa me lo nis co; sac wban Noé zigne racladz me.

<sup>6</sup>Scaque len dze ne wban Lot, bdziguiend me grë miech yozh ne bio guiedz Sodom ni guiedz Gomorr, blaal me gui grop guiedz co, bnitlo me zho grëse zho, xquidiese biaan. Laa me been min co, zeena ga gan grëraa zha ntseeb ganle pe nac mine tsieguial zho telne csaand zho xquielntseeb zho. <sup>7-8</sup>Lotse psilaa me, sac bioxco Lot mine rnabey me. Gapaa no Lot, ranpaa me zha run grë miech co; haxta mban rac zdoo me, ran me gzataa dze loxaque grë guielyozh noyun zho. <sup>9</sup>Gase na ganle rlu ib rsaand Dios zha ne rnalopaa me, rsaand me guiab zho lo dol; ni scagaa grë zha ne rsaand guielntseeb, ib tedsod zho lo guielnë dox ne cteed me zho gal dze ne laa me gun guielwxtis.

<sup>10</sup>¡Zig nac zha ne guiaadquidie to ga, mincopaa yгаа zho! Ni lalnu gandzed Dios zho; sac gon, laa zho zienal loxaque grë guielyozh ne gdeed guxt xcuerp zho. Miech nad, miech niats nac zho, rzhidznie zho mine rnabey Dios, ni lalnu dzeb guiend lo zho rdzibdee zho grë men non ne no gbaa. <sup>11</sup>Per ni grë anjl, niicle ne zha nroob nac anjl, niicle ne rap anjl poder, per rdzind anjl lo Dios gdzibdee anjl zho. <sup>12</sup>Per zha, lo xquielyozh zho ga, haxta ncuaane riend zho zha nac, rdzibdee zho. Lëëdaa grë ma nac zho, tel ma laa ma ralse par yгаа ma nitlo ma; guindraa xquielrien zho, ncuaane racladzttaa zho run zho. Per dzin dze ne nitlo zho, zigne rnitlodaque grë ma, <sup>13</sup>por grëtaa guielntseeb, grëtaa guielyozh ne squitaa rley zho run zho haxta zobna ngbidz.

Miech mbixladza, miech ngubeeguieltow, rquiaalose zho miech wen nac zho zeene riaadsobnie zho to lo zhilni to. <sup>14</sup>Wnaa ne gantaa zho, pe na gzoobladz zho tsonie zho wnaa co, tibaque quiayunctal zho xtol zho. Rio zho rquiil zho grë zha ne gard sodziits lo Xtiidz Dios; rienle zho zha gla zho ncuaane rquiin lo zho. Miech ndziibdeele nac zho, <sup>15</sup>sac laa zho psaanle xnëz Dios, nëz ne nitlole zho no zho; lëë zho run xcuent Balam, xpëed men ne lë Beor. Tel Balam, haxta mine nonguieldraa been me par gun me gan dimi; <sup>16</sup>per bdzin tib dze zeene laa Dios blisqui lo me grëtaa ncuaane quiayun me ga. (Bnabey Dios lëëque xpurr Balam bnee, dzigora bien Balam psaan me xquielyozh me ga.)

<sup>17</sup>Masaque nac zho zig nac grë bzie ne bidzle nis, zig nacгаа xcow bidz ne nëzrii nëzrec zienie me; ni lalnu paat rquiind zho. ¡Laa zho nole guey zho lo guielcowdoo ne rieguial zho, zaatne gdzindraa dze gree zho!

<sup>18</sup>Niats rzë xtiidz zho, per ncuaane paat rquiind rnee zho. Mine mazdraa mban run zho, rio zho lëëque lo grë guielyozh ne rdeed guxt xcuerp zho rquiil zho grë zha ne pense brieë lo dol, rlozh ga rbiire riab zha co lo grë dol co stib. <sup>19</sup>Rnee zho zac tel zhataa gban ne, nodne gnabey xley Dios ne. Rzac zho na choot rnabeyd zho, ni riend zho dol quianabey lo zho; sac grëse zha ne gacdraa csaan tel pe grë guielyozh ne run zho, lëële grë ncuaan co rnabey lo zho.

<sup>20</sup>Tib zha ne sca brieële lo grëtaa ncuaane ndzinlid ne no lo guidzliu rii (porne bliladz zho Jesús, men ndzon ne rnabey, men ne rsilaa miech lo dol), ni gbiireque zho gdeed zho diidz guiab zho low gnabeya zho, mban gon tsie zho; sac dzigole mazdraa mban guiaan zho.

<sup>21</sup>Lëda ga gon, telne gocnanle zho zha racladz Dios gban zho, ni lozh ga csan zho xtiidz me tib lad, gbiire zho tso zho lo grë ncuaan yozh ne been zho glo.

Nroobdox caxtigw ne gan zha co, mazd zhi mine yгаа zha ne gocnand zha nac xtiidz me. <sup>22</sup>Zha copaa nagon run mine rnee diidz ne znu rëb: “Nandraaque mëcw, ncuane bdzible ma rbiire ma row maw”; ni stib mine znu rnee: “Ngutzshe, rlozhle raz ma nis mbe, ni rlozh ga rieгааaque ma lo nis beñ.”

### ¿Zha nacne gard guiaad Jesús?

**3** Bets, bzian, golgan ganle lëele guits rii raca chop zixel naa. Gropse low, rso naa diidz lo to tsoxco to zaacse gban to, ine niini gac guic to. <sup>2</sup>Golsoladz ganle, zha nac grëse mine bnee grë zha ne biadteed xtiidz Dios padzeela; golsoladz zha nac grë mine rnabey Jesús, mine biadseed no to. (Jesús, men ndzon ne rnabey ne, men ne psilaa ne lo grëtaa xtol ne.)

<sup>3</sup>Racladz naa gacnan to ganle, len dze ne ziaadyob guiaad Jesús, zriequia zha ne gzhidznie xtiidz me, csilo zho gun zho grëtaa guielyozh ne gzoobladz zho; <sup>4</sup>guiab zho: “¡Pe gliladz ne nazho guiaad Jesús! Telne nli rëb me laa me guiaad, ¿yo me na? Grë xmengol ne, zha ne scataa pquiambëz me, laa zho gutle, ¿cho na zho guiaad? Znutaque nac lo guidzliu wlal ne brew.”

<sup>5-6</sup>Squiaalo zho rsoladzd zho zha bnitlole guidzliu tib vuel, ni zhagaa nitlo mine no niina. Wen wen nan zho ganle zha bnabey Dios biao guidzliu, me bnabey brieew lo nis, ni masaque lo nis now; mincocxe waa nis bnitlow glo. <sup>7</sup>Scaque, nacle xtiidz Dios, zigtaa gbaaw, zigtaa guidzliu ne no niinaw, laaw nitlo, per lo guile nitlow; ni lo gui co nagon yгаа grëse zha ne run guielntseeb ted zho caxtigw.

<sup>8-9</sup>Zha ne rzac quiayaanladz Jesús diidz ne psan me ga, per led quiayaanladz mew; sinque laa me quiambëz tebaa grëse miech gac-wen lo me. Laa me racladz, grëse zho csaan xquielntseeb zho, zeena ni tib zho nitlod.

Bets, bzian, nanle to ganle led yed me ngab xtse. Sac tel me, ncuane gun ne tib milraa iz, tib dzeque gun mew; nroob rzac ne tib mil iz, per par me rzacse mew, lal ne rzac ne tib dze. <sup>10</sup>Ib laa me no guiaad, per choot nan dien pa horpaa guiaad me; laa me guiaad zig rzëëbse tib ngbaan yu, tibaque zeene gan miech laa me ziaadle. Grëse ncuane no, hor co laaw lozh; bi dox ne gdzieb ne tso zeene laa gbaa nitlo; grë mel ne ndziib gbaa, masaque gazbel ma; haxta guidzliu, dib nacesw laaw tsec.

<sup>11</sup>Scataa nagon nitlo guidzliu rii, ni grëraa ncuane rdzian ne niina, igolguien sca golban zigne racladz men ndzon ne rnabey ne, gunctaldras to xtol to! <sup>12</sup>Tibaque golconie guic to ne ib laa me no guiaad; tibaque ndzinli golban, gollu ne quiambëz to gdzinnioob dze ne sca gazbel grë ncuane ran ne gbaa, dze ne sca tib guiaalse grë ncuane niaaw. <sup>13</sup>Hor co nagon laa ne dzian tib gbaa cub, laa ne dzian tib guidzliu cub ne psanle me diidz yгаа ne; zaatne tsodraa guielntseeb.

<sup>14</sup>Bets, bzian, nligaa goltsoxco ndzinli golban, gunctalde to xtol to; niowse golbannie samiech to, zeena gal dze ne laa Jesús guiaad, ine gleynie me to gan me mban to zigne racladz me. <sup>15</sup>Golsoladz ganle, porne quiambëz me gbig grëraa miech lo me csilaa me zho lo dol, min co gane gard guiaad me.

Ye bets ne Pabl, meṇ ne nziuu lo ne, lo grē guielbiini ne rdeed Dios lo me rquiaa me grē guits ne zixeel me, zineelee me lo to grē miṇe none naa nu. <sup>16</sup>Parga nli no miṇe rnee me ga, ngaṇ guieṇ ne zha naca; grē zha ne rdziinpaa racladz ctsëë Xtiidz Dios, zeenee laa zho rneew, laa zho rneeleez zigne racladz zho; zigne ruṇaque zho grëraa miṇe zhobnee lo Xtiidz Dios. Zha ne sca ruṇ, lëëque zha noguib nitlo zho ga.

<sup>17</sup>Laa naa rzet grē miṇ rii lo to nu, zeena nsin so to, ib gdeete to diidz cho grē zha ntseeb ne sca nac guiaadquidie to, yquiiil zho to csaan to miṇe nac diidzli, csaan to nëz ne ziele to i. <sup>18</sup>Goltsoxco zig zie dze guieṇraa to pa lotaa rleynie Dios to, ni guieṇraa to cho nac Jesús, meṇ ndzon ne rnabey ne, meṇ ne psilaa ne lo doḷ.

Me nac meṇ non, me nac meṇ nziuu, ible me rieguaḷ gunnon miech, zigtaa niinaw, zigtagaa grē izdoe ne ziaadraaw. Sca rieguaḷa. *Pedr*